

## Seodra sa Daingean

### Ceist 1

Beidh tú ag féachaint ar ball ar thuairisc faoi sheodra ársa a aimsíodh i gCiarraí. Bí ag obair leis an duine in aice leat agus déanaigí cur síos ar an ngrianghraf thíos. Cad is féidir libh a rá faoin seodra ón bpictiúr?

Bainigí úsáid as na focail seo chun cabhrú libh:

*bróiste, ór, cód rúnda, cloch luachmhar, miodóg*



### Ceist 2

Ceangail na focail Ghaeilge leis na focail Bhéarla thíos.

- |                                 |                          |
|---------------------------------|--------------------------|
| 1. <i>close to</i>              | a. greanta               |
| 2. <i>precious</i>              | b. luachmhar             |
| 3. <i>engraved</i>              | c. An Galar Dubh         |
| 4. <i>skill of the jeweller</i> | d. cré-umha              |
| 5. <i>spellbound</i>            | e. cóngarach do          |
| 6. <i>bronze</i>                | f. oilteacht an tseodóra |
| 7. <i>tourmaline</i>            | g. litreacha Gotacha     |
| 8. <i>Gothic letters</i>        | h. faoi gheasa           |
| 9. <i>The Black Death</i>       | i. túrmailín             |

1	2	3	4	5	6	7	8	9

Anois, féach ar an tuairisc den chéad uair le feiceáil an raibh an ceart agat.

### Ceist 3

Féach ar an tuairisc den dara huair agus abair cé acu fíor nó bréagach atá na ráitis seo a leanas.

1. Seandálaí a bhí ag tochailt a d'aimsigh an bróiste.

2. Tá an bróiste i mBaile Átha Cliath anois.
3. Is minic a thagtar ar bhróistí óir den chineál seo.
4. Is saifír í an chloch luachmhar.
5. Ceapann na saineolaithe gur paidir ghearr nó cód cosanta atá sna litreacha atá greanta air.
6. Coinneofar an bróiste sa mhúsaem i mBaile an Fheirtéaraigh go fadtéarmach.

**Ceist 4**

Éist leis an mír arís.

- A. Aimsigh cúig fhocal ón mír, le dul faoi gach teideal sa bhosca. Tá sampla déanta duit.

ainmfhocal	aidiacht	briathar	réamhfhocal simplí	forainm réamhfhoclach
fear	mór	aimsigh	i	air

- B. Cum cúig abairt anois leis na focail sa bhosca.  
C. Féach cad a bhí ag an duine in aice leat.

**Ceist 5**

'*i* dtaisce **san** Ard-Mhúsaem'

Bí ag obair leis an duine in aice leat. Cad is féidir libh a rá faoi na réamhfhocail i gcló dubh?

**Ceist 6**

Pléigh na ceistanna thíos leis na daoine eile i do ghrúpa.

1. Samhlaigh gur tú féin a d'aimsigh an bróiste ársa. Conas mar a mhothófá faoi sin?
2. An mbeadh a leithéid de bhróiste faiseanta sa lá atá inniu ann? Cén fáth sin, meas tú?
3. Conas a chuireann an tseandálaíocht leis an tuiscint atá againn ar chúrsaí staire?

## Treoracha agus Freagraí

### Ceist 1

Tá an plé seo le déanamh sula seinntear an tuairisc.

### Ceist 2

Tá an cheist seo le déanamh sula seinntear an tuairisc.

1	2	3	4	5	6	7	8	9
e	b	a	f	h	d	i	g	c

### Ceist 3

1. Bréagach. Sasanach a bhí ar laethanta saoire agus a bhí ag siúl ar an tsráid a d'aimsigh é.
2. Fíor.
3. Bréagach. Is minic a thagtar ar bhróistí den chineál seo **ach** is bróistí cré-umha iad.
4. Bréagach. Shíl siad gur saifír í ar dtús ach tuigtear anois gur túrmailín atá ann.
5. Fíor.
6. Bréagach. Coinneofar an bróiste sa mhúsaem i mBaile an Fheirtéaraigh go gearrthéarmach agus beidh sé i mBaile Átha Cliath ina dhiaidh sin.

### Ceist 4

ainmfhocal	aidiacht	briathar	réamhfhocal simplí	forainm réamhfhoclach
fear cloch domhan rud cuairteoir	mór beag luachmhar sábháilte rúnda	aimsigh bí siúil tar déan	i de ar ó faoi	air aige orainn againn linn

Abairtí samplacha:

D'aimsigh an buachaill óg, a raibh súile gorma aige, cloch luachmhar i gcoill.

Beidh cuairteoir rúnda ar saoire againn.

Shiúil sé an domhan mór faoi scáth na hoíche agus ní raibh eagla air.

Tiocfaidh rud beag faoisimh ó theas na tine agus beidh áthas orainn.

Rinne an fear foscadán sábháilte de gach rud a bhí in aice linn.

### Ceist 5

Ciallaíonn *i* 'in' i mBéarla – *i mBaile Átha Cliath, i mbosca*.

Ciallaíonn *sa* (i + an) 'in the' i mBéarla – *sa Fhrainc, sa bhosca*.

Cuirtear 'n' roimh ghúta – *in uisce, in Albain; san uisce, san Aontas Eorpach*.

### Ceist 6

Is féidir gach beirt a chur ag déanamh an phlé seo agus ansin na ceisteanna a phlé leis an rang iomlán.

### Siún Nic Gearailt

Tá bróiste óir, ocht gcéad bliain d'aois, aimsithe i gCorca Dhuibhne. Fear a bhí amuigh ag siúl cóngarach don Daingean a tháinig ar an mbróiste. Tá cloch luachmhar ann agus cód rúnda greanta air.

### An Dr. Nessa O'Connor, Ard-Mhúsaem na hÉireann

Oh tá sé an-bheag ar fad.

### Seán Mac an tSíthigh

É slán sábháilte i dtaisce san Ard-Mhúsaem. Áilleacht agus oilteacht an tseodóra i bhfeighil ocht gcéad bliain ó shin. Aimsíodh<sup>1</sup> an bróiste luachmhar, ón dtríú<sup>2</sup> haois déag, cóngarach don Daingean, agus tá seandálaithe faoi gheasa aige.

### An Dr. Nessa O'Connor, Ard-Mhúsaem na hÉireann

Tá áthas an domhain orainn an ceann seo a fháil. Tá roinnt mhaith dóibh sin againn sa bhailiúchán, ach amháin déanta de chré-umha. Is annamh an rud teacht ar cheann déanta d'ór.

### Isabel Bennet, Seandálaí

Agus chonaic sé é idir na clocha ag glioscarnach<sup>3</sup>.

### Seán Mac an tSíthigh

Ba anseo ar an gCluais Mhóir a d'aimsigh Ian Andrew an bróiste. Cuairteoir ó Shasana a bhí ar saoire i gCorca Dhuibhne.

### Isabel Bennet, Seandálaí

An rud is neamhghnáiche ná go bhfuarthas<sup>4</sup> an bróiste anseo i gCorca Dhuibhne. Ní raibh riamh a leithéid feicthe againn anso<sup>5</sup>. Níl a fhios againn cárbh<sup>6</sup> as ar tháinig sé. An raibh sé istigh i gcré in aice linn agus leis an mbáisteach gur tháinig sé amach? B'fhéidir gur éan a phioc suas é ó áit eile agus gur thit sé as a bhéal.

### An Dr. Nessa O'Connor, Ard-Mhúsaem na hÉireann

Tá cloch gheal ghorm ann agus cheapamar i dtús báire b'fhéidir gur saifir a bhí i gceist ach anois tuigimid gur túrmailín atá ann.

### Seán Mac an tSíthigh

Agus, tá litreacha Gotacha breactha air, cód rúnda, a mheastar.

### An Dr. Nessa O'Connor, Ard-Mhúsaem na hÉireann

Tá a fhios againn ó chinn eile atá sa bhailiúchán agus atá i músaeim eile, gur corr uair is b'fhéidir paidir ghearr<sup>7</sup> nó cód cosanta de shórt mar gheall ar na galair a bhí mórthimpeall faoin am sin, sa tríú céad déag agus sa cheathrú (céad) déag, mar shampla an *Black Death*<sup>8</sup>.

---

<sup>1</sup> *d'aimsíodh* a dúradh

<sup>2</sup> Córas na Mumhan

<sup>3</sup> ag *glioscarnaigh* a dúradh

<sup>4</sup> *go bhfuaradh* a dúradh

<sup>5</sup> *anseo* an leagan caighdeánach

<sup>6</sup> *cár as* a dúradh

<sup>7</sup> *gearr* a dúradh

<sup>8</sup> *An Galar Dubh* an leagan Gaeilge.

**VIFAX 04 Deireadh Fómhair 2018**  
**Bunleibhéal**

Beidh deis ag pobal Chorca Dhuibhne súil a chaitheamh ar an mbróiste Dé hAoine agus Dé Sathairn beag so<sup>9</sup>, anso i Músaem Bhaile an Fheirtéaraigh. Ina dhiaidh sin tá sé beartaithe é a bheith mar chuid de thaispeántas níos buaine in Ard-Mhúsaem na hÉireann i mBaile Átha Cliath.

Seán Mac an tSíthigh, Nuacht TG4, Corca Dhuibhe.

---

<sup>9</sup> *seo* an leagan caighdeánach